

बारह-भावना

(कविवर पण्डितश्री दौलतरामजी कृत छहढाला की पाँचवीं ढाल से)

(देहा)

मुनि सकलव्रती बड़भागी, भव भोगन तैं वैरागी ।
वैराग्य उपावन माई, चिन्तैं अनुप्रेक्षा भाई ॥
इन चिन्तत सम सुख जागैं, जिमि ज्वलन पवन के लागैं ।
जब ही जिय आतम जानैं, तब ही जिय शिव सुख ठानैं ॥

(अनित्यभावना)

जोवन^१ गृह गो^२ धन नारी, हय गय^३ जन आज्ञाकारी ।
इन्द्रिय भोग छिन थाई, सुरधनु^४ चपला चपलाई ॥

(अशरणभावना)

सुर असुर खगाधिप जेते, मृग ज्यों हरि काल दले ते ।
मणि मन्त्र तन्त्र बहु होई, मरतैं न बचावैं कोई ॥

(संसारभावना)

चहुँ गति दुःख जीव भरे हैं, परिवर्तन पञ्च करै हैं ।
सब विधि संसार-असारा, यामैं सुख नाहिं लगारा ॥

(एकत्वभावना)

शुभ-अशुभ करम फल जेते, भोगे जिय एकहि तेते ।
सुत^५ दारा^६ होय न सीरी^७, सब स्वार्थ के हैं भीरी^८ ॥

१. यौवन; २. गाय; ३. हाथी-घोड़ा; ४. इन्द्रधनुष; ५. पुत्र; ६. स्त्री; ७. साथी; ८. सगे

(अन्यत्वभावना)

जल पय ज्यों जिय तन मेला, पै भिन्न-भिन्न नहिं भेला ।
तो प्रकट जुदे धन धामा, क्यों है इक मिलि सुतरामा ॥

(अशुचिभावना)

पल रुधिर राध^१ मल थैली, कीकस^२ वसादि^३ तैं मैली ।
नव द्वार बहैं घिनकारी, अस देह करैं किम यारी ॥

(आस्रवभावना)

जो योगन की चपलाई, तातैं है आस्रव भाई ।
आस्रव दुःखकार घनेरे, बुधिवन्त तिन्हें निरवेरे ॥

(संवरभावना)

जिन पुण्य-पाप नहिं कीना, आतम अनुभव चित दीना ।
तिनही विधि आवत रोके, संवर लहि सुख अवलोके ॥

(निर्जराभावना)

निज काल पाय विधि झरना, तासों निज काज न सरना ।
तप करि जो कर्म खिपावै, सोई शिवसुख दरसावै ॥

(लोकभावना)

किन हू न कर्यो न धरैं को, षट् द्रव्यमयी न हरै को ।
सो लोक माहिं बिन समता, दुःख सहै जीव नित भ्रमता ॥

(बोधिदुर्लभभावना)

अन्तिम ग्रीवक लौं की हद, पायो अनन्त विरियाँ पद ।
पर सम्यग्ज्ञान न लाधौ, दुर्लभ निज में मुनि साधौ ॥

(धर्मभावना)

जो भाव मोह तै न्यारे, दृग ज्ञान व्रतादिक सारे ।
सो धर्म जबै जिय धारै तब ही सुख अचल निहारै ॥